

«L'auter onn ei l'entira vischnaunca en pei»

Trun ei amiez las preparativas per la fiasta «Sut igl Ischi 2024». In tshuppel arranschaments da cultura ein previ dalla fin da mars entochen l'entschatta november 2024. Il president communal da Trun, Dumeni Tomaschett, ei perschadius da saver porscher als visitaders eveniments nunemblideivels.

HANS HUONDER/FMR

Igl onn 2024 eis ei 600 onns dapi igl engriment dalla Ligia Grischa sut igl ischi legendar a Trun. Quei tiem nezegia la vischnaunca per porscher in vast program da cultura alla populaziun. *Dumeni Tomaschett* (62) ch'ei president communal da Trun dapi nov onns, ei alla testa dall'organisaziun. Sut si'egida lavura bia gliued vid ils differents elements dalla purschida che cumpeglia in tshuppel arranschaments. La FMR ha discurreu cun Dumeni Tomaschett davart l'impurtonza dalla historia e la cultura per Trun, mo era davart las aspectativas da quella festività da giubileum.

FMR: L'auter onn festivescha Trun 600 onns dapi igl engriment dalla Ligia Grischa sut igl ischi a Trun. La partenza dil program vegn fatga ils 30 da mars 2024. Tgei vegnis Vos a dir quei di alla gliued?

Dumeni Tomaschett: Probabel vegn jeu a dir ch'ieu seigi leds e cuntents ch'ei possi entscheiver. En detagl hai jeu denton aunc buca studegiu quei. Nus essan ussa gia treis onns vid las preparativas, quei ei in liung temps. Il kick-off fagein nus sut igl ischi sper la baselgia da s. Onna, lu marschein nus atras il vitg en accumpignment dalla musica. El Museum sursilvan Cuort Ligia Grischa vegn ei lu a dar entgens plaids.

Plirs eveniments ein previ, sin tgein spitzgeis Vos il pli vess?

Quei ei grev da dir, damai che tuts arranschaments vegnan ad esser fetg specials. Jeu patratgel vid ils concerts, da «Dégas e fatg(a)s d'ina perdetga metta», mo lu era vid il teater che fuorma aschidadir il culp final. Gronda calamita vegn era la fiasta da cant districtuala dalla Surselva a haver sco era las occurrenz el museum. Il settember ein lu era previdas las undrientschas novas el Curtin d'honor. Quei ei segiramein er in eveniment special. Tut quels arranschaments vegnan preparai da gliued ordvart qualificada, aschia che las aspectaturas ed ils aspectatur astgan selegrar sin in program d'aula qualitat.

In tshuppel uniuns e persunas ein involvidas ell'organisaziun e las presentaziuns. Ei pli u meins l'entira vischnaunca da Trun en pei l'auter onn?

Quei vegn ad esser aschia. Principalme in pil teater e la fiasta da cant districtuala duvrein nus biars voluntaris, mo er els ulteriurs arranschaments ein biaras uniuns involvidas. Mo buca mo las uniuns, mobein era la politica vegn a mussar colur, seigi quei la suprazonza communal sco il cussegl da vischnaunca. Igl ei buca mo da seppresentar, mobein era luvrar.

Vus essas al tgamun dall'organisaziun «Sut igl Ischi 2024». Tgeininas ein las pli grondas sfidas?

(Dumeni Tomaschett ri): Gliez vegn per ora. La pli gronda sfida ei segiramein l'aura ils dis dallas presentaziuns dil teater el liber. Schliat'aura fass secapescha buca bien. Tut tschei sa vegnir preparau ad uras e selai far. Jeu sun perschadius che tuts involvi prestan fetg buna lavur.

Las finzas – ein ellas negina sfida?

La vischnaunca ha dau in credit da 850 000 francs pigl entir arranschament. Nus quintein denton buca da stuer survargar quei credit per dapli ch'in miez milliun francs. Plirs sponsurs han gia sincerau lur sustegn, cun bein en qualin essan nus aunc en discuers. Il



Il president communal da Trun, Dumeni Tomaschett, selegra sil program «Sut igl Ischi 2024» pil giubileum da 600 onns dapi igl engriment dalla Ligia Grischa a Trun.

FOTO LOTAR TOMASCHETT

preventiv per la fiasta ei calculaus cun 890 000 francs.

La vischnaunca da Trun sefa biala per l'auter onn, denter auter era cun ina nova staziun da viafier. Ei quei giubileum in ulteriu accent ellas activitads da Trun sco center da cultura ed art dalla Surselva?

Quei ei aschia. Igl ei in privilegi per nus tuts d'astgar viver quei onn da giubileum. La proxima fiasta centenara dalla Ligia Grischa festiveschan auters. Per nus ei la Ligia Grischa identica cun Trun. Da quei ein buca tuts pertscharts, era buca ch'il num da nies cantun Grischun deriva dalla Ligia Grischa. Trun ha ina gronda schientscha per la cultura

«Igl ei in privilegi per nus tuts d'astgar viver quei onn da giubileum.»

da cant e musica, la historia ed igl art. Da cheu derivan artists, scribes, cantadurs e cantadurs. Il Curtin d'honor ei il center dalla cultura dalla regiun.

Con bein ei quella cultura semantenida?

Il chor viril e la musica ein stai decennis ils «leaders» dalla cultura a Trun. Quei ei semidau empauet ils davos onns, oz eis ei surtut igl art che dominescha, mo lu era la cultura surregiunala che va da Trun anora. Jeu patratgel vid il Cantus Firmus cul dirigent Clau Scherrer alla testa. Senza el dess ei buca quella formaziun en quella fuorma.

Conta gliued spetga Trun als arranschaments reparti sigl entir onn?

Quei ei fetg grev da dir. Nus havein ina finamira e quella semova enzanua denter 5000 e 6000 visitadras e visitaders per tut quels arranschaments. Alla fiasta da cant districtuala persula vegnan da quei da 1000 cantadurs e cantadurs a separticipar, leutier igl auditori.

In'impurtonta rolla gioga era il Museum sursilvan Cuort Ligia Grischa igl onn vegnent. Tgei muntada ha quei museum per Trun?

Il Museum sursilvan Cuort Ligia Grischa ei segiramein il liug ch'atila la biera gliued cheu a Trun, seigi pervia dallas exposiziuns d'art ni la bellezza sala da dertgira. Quei vegn er ad esser il cass l'auter onn en connex cun ses arranschaments specials. Il museum vegn menaus exemplaricamein e cun gronda breigia ed ussa – cul curtin formau da niev e la fatschada renovada – seppresenta el en in fetg bi vestgiu. La vischnaunca da Trun ei representada el cussegl da fundaziun dil museum. Bien sustegn ha quel dalla gruppa da faaturas e fautors.

Il flyer cul program dil giubileum, repartius dacuort ellas casadas, dat ina survesta dils biars termin da cultura e historia l'auter onn a Trun. Tgei duei restar en fuorma persistenta da quei giubileum centenar?

Da quella fiasta centenara restan segiramein las regurdientschas persunalas. Quellas vegnan er ad esser en fuorma da films, fotografias e per finir forsa schizun ina broschura. Secapescha che nus lein porscher ina fiasta che resta en memoria cunzun alla populaziun dalla Cadi, mo era d'atras parts digl intschess dalla Ligia Grischa. La gliued duei daventar pertscharta dalla muntada dalla Ligia Grischa.

La finissascha da «Sut igl Ischi 2024» ei ils 4 da november 2024 el Museum Cuort Ligia Grischa. Cun tgei plaids giavischeis Vos il pli bugen da saver terminar quei onn giubilar?

Quei di less jeu saver dir ch'ils arranschaments seigien reussi senza incaps ed accidents. Lu naturalme in era da haver sentiu che la populaziun dalla vischnaunca e dalla regiun seigi stada cuntenta e satisfatga da quei ch'ei vegniu purschiu.

«Sut igl Ischi 2024»

Igl onn vegnent 2024 eis ei 600 onns dapi gl'engriment dalla Ligia Grischa sut igl ischi a Trun. Quei tiem vegn festivaus a Trun cun in tshuppel arranschaments.

Igl onn 1424 han ins confirmau, approfondau ed amplificau la Ligia Sura – che las vischnauncas dallas valladas dil Rein Anterior e dil Rein Posterior havevan fundau enzacons onns avon a Glion – cun ulteriuras vischnauncas e renunnav ella Ligia Grischa. Quei ei succediu a Trun sut igl ischi. L'allianza ha garantiu la segirtad sin las vias ed aschia possibilitau il traffic e commerci liber. Ils acturs han engriau «schi ditg che stattan cuolms e vals» e han firmau cun quels plaids lur empermischun da procurar per segirtad e defensiu vicendeivla sco era da segirar dretgs e possess. La vischnaunca da Trun festivescha quei eveniment ch'ei da gronda impurtonza pil cantun Grischun. Duront igl entir onn da giubileum 2024 han liug differentas activitads ella vischnaunca da Trun. Treis occurrenz pli grondas fuormen ils puncts culminants dalla festivitàs.

«Chor viril Ligia Grischa» sin viadi

Ina seria da concerts dil Chor viril Ligia Grischa els loghens d'impurtonza per la Ligia Grischa Trun, Glion, Domat e Mesocco: Ils concerts da tempra historic-patriotica vegnan accumpignai d'in quintet musical e cuntegnan ovras dil composit e dirigent *Christoph Cajöri*. Cumpletttau cun texts dad *Adolf Collenberg* daventan ils concerts in eveniment unic che lai reviver quei «spért da libertad dils 1424».

Dégas e fatg(a)s d'ina perdetga metta

In'ovra multimediala cun cant, musica e films, che sa vegnir visitada a treis produziuns a Trun: Il fil tgeitschen da quella ei la historia digl ischi da Trun. D'ina vart vegn raquintau ord la historia dalla plonta sco tala naven da sia entschatta tochen oz a maun da fatgs historics. Da l'autra vart la historia co igl ischi da Trun ei daventaus quella perdetga mitica dalla Ligia Grischa onns alla liunga venerada sc'ina reliquia. Affons, chors, solistas, solists ed orchester contan e sunan la musica accumpignada da malets, films cuorts e fatgs historics. La direziun musicala da quell'ovra schai tier *Clau Scherrer*. *Lorenz Dangel* (cumposiziun) e *Gieri Venzin* (cudisch e reschia) ein auters acturs principals da quei spectacel adattaus al giubileum da 600 onns Ligia Grischa.

«Sut igl Ischi – il teater»

Il teater el liber «Sut igl ischi – il teater» vegn presentaus diescha ga. El tematisescha plirs aspects: Tgei piarda ina vischnaunca, sch'ella emblida si'identitad e siu spért ni sch'ella vegn dirigida d'ordvart? Tgi sa oz aunc mobilisar forzas per defender l'autonomia, il plascher e la luschezza, per l'appartenenza ad ina cuminonza che decida libramein? Il teater, ch'ei vegniu scret explicitamein pigl onn da giubileum gioga el temps dad oz, selai denton era inspirar da fatgs historics dalla veglia Ligia Grischa. El ei il medem mument frestgs, humoristics e divertents. Ina historia cun in artg ch'unescha text e musica. Il toc amiez Trun duei incantar aschibein il public giuven sco era pli vegl. Aurtur dil toc ei *Michel Decurtins* ch'ei sez carschius si a Trun. La musica, che *Mario Pacchioli* ha cumponiu aposta pil toc, lai daventar la presentaziun in'unitad homogena. Per la reschia ei *René Schnoz* responsabels. La produziun vegn menada dad *Esther Berther*.

Ulteriurs arranschaments

Sper quellas occurrenz ein differentas contribuziuns dad organisaziuns da cultura e dad uniuns localas planisadas. Aschia porscha il Museum Sursilvan Cuort Ligia Grischa in'exposiziun speciala cun il tema «Sogn Gieri 1698». Ensem cun las protagonistas ed ils protagonisti sa la dieta annuala il di da Sogn Gieri 1698 vegnir persequitada ella Cuort Ligia Grischa en fuorma da differentas medias.

La Societad da musica Trun dedicescha siu concert annual al giubileum da 600 onns Ligia Grischa. Ella vegn a presentar, sper ovras da brass tematicamein adattadas, entgens classichers dils cantauturs romontschs «Alexi e Marcus», specialme in arranschai da *Corsin Tuor* ensem cun ils cantauturs.

La 46avla Fiasta da cant districtuala dalla Surselva ha liug ils 15 da zercladur sut il tetel «Trun Conta» a Trun. Era quella fiasta da cant cuntegn elements dil giubileum.

Il settember 2024 vegnan sis persunalitads meriteivlas per lungatg e cultura romontscha undrai el «Curtin d'honor» sper la caplutta da s. Onna a Trun. (cdm/fmr)



Il Museum Cuort Ligia Grischa presenta l'auter onn in'exposiziun speciala cun il tema «Sogn Gieri 1698».

FOTO HANS HUONDER